

MINISTERIO DE AGRICULTURA, PESCA E ALIMENTACIÓN

1471 *ORDE APA/53/2007, do 17 de xaneiro, pola que se modifica o Catálogo Oficial de Razas de Gando de España, contido no anexo do Real decreto 1682/1997, do 7 de novembro, polo que se actualiza o Catálogo Oficial de Razas de Gando de España. («BOE» 21, do 24-1-2007.)*

O Real decreto 1682/1997, do 7 de novembro, polo que se actualiza o Catálogo Oficial de Gando de España, establece o procedemento de modificación do anexo que contén este catálogo.

De acordo co artigo 4 do citado real decreto, a modificación do anexo baséase, neste caso, nas propostas que os gobernos do Principado de Asturias, da Junta de Andalucía, da Generalitat de Cataluña e da Junta de Castilla y León e a Federación Española de Asociacións de Gando Selecto presentaron no Comité de Razas de Gando de España.

Na elaboración desta orde foron consultadas as comunidades autónomas, entidades representativas do sector, así como entidades científicas en materia de reprodución, selección e xenética animal.

Na súa virtude, dispoño:

Artigo único. Modificación do anexo do Real decreto 1682/1997, do 7 de novembro, polo que se actualiza o Catálogo Oficial de Razas de Gando de España.

No Catálogo Oficial de Razas de Gando de España contido no anexo do Real decreto 1682/1997, do 7 de novembro, polo que se actualiza o Catálogo Oficial de Razas de Gando de España, introdúcense as seguintes modificacións:

a) No punto 1.1, parágrafo da especie porcina, incorpóranse as razas «Ibérica (variedade Retinto)» e «Ibérica (variedade Entrepelado)».

b) No punto 1.1 incorpórase a especie aviaria, incluíndose baixo esta epígrafe a raza «Combatiente Español».

c) No punto 1.2, parágrafo da especie bovina, incorpórase a raza «Morucha (variedade Negra)».

d) No punto 1.2, parágrafo da especie porcina, incorpóranse as razas «Gochu asturcelta», Ibérica (variedade Torbiscal) e Ibérica (variedade «Lampião»).

e) No punto 1.2, parágrafo da especie aviaria, incorpóranse as razas «Penedesenca», «Gallina empordanesa», «Oca empordanesa», «Gallina del Prat», «Andaluza azul» e «Utrerana».

f) No punto 3 incorpórase a especie ovina, incluíndose baixo esta epígrafe a raza «Lacaune».

g) No punto 3 incorpórase a especie caprina, incluíndose baixo esta epígrafe a raza «Alpina».

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 17 de xaneiro de 2007.—A ministra de Agricultura, Pesca e Alimentación, Elena Espinosa Mangana.

1472 *ORDE APA/54/2007, do 22 de xaneiro, pola que se establecen medidas específicas de protección en relación coa lingua azul. («BOE» 21, do 24-1-2007.)*

A lingua azul ou febre catarral ovina é unha enfermidade incluída na lista do Código Zoosanitario Internacional da Organización Mundial da Sanidade Animal. A súa propagación supón un risco para o gando e podería ter consecuencias moi desfavorables para os intercambios comerciais a nivel internacional. As medidas específicas de loita contra a enfermidade están reguladas polo Real decreto 1228/2001, do 8 de novembro, que establece medidas específicas de loita e erradicación da febre catarral ovina ou lingua azul.

O 13 de outubro de 2004, o programa de vixilancia da lingua azul previsto no artigo 11.1.b do Real decreto 1228/2001, do 8 de novembro, puxo de manifesto a circulación do virus da lingua azul en territorio peninsular. As medidas de protección a nivel comunitario foron adoptadas mediante decisións da Comisión, sendo a última a Decisión 2005/393/CE, do 23 de maio de 2005, relativas ás zonas de protección e vixilancia en relación coa febre catarral ovina e as condicións que se aplican aos traslados de animais desde estas zonas ou a través delas. Desde a súa aparición na península, a enfermidade caracterizouse por presentar un silencio epizootiolóxico en función da dinámica estacional do vector en determinadas épocas do ano; así, tras os últimos focos notificados a finais de 2004, a enfermidade reemerxeu na península en xullo de 2005, cesando a circulación viral novamente en decembro dese mesmo ano. En setembro de 2006 volveuse constatar a circulación do virus da lingua azul, tendo cesado esta en decembro do mesmo ano.

De acordo coa Lei 8/2003, do 24 de abril, de sanidade animal, e sen prexuízo das medidas adoptadas pola Comisión Europea, mediante a Orde APA/3411/2004, do 22 de outubro, establecéronse medidas específicas de carácter urxente respecto da lingua azul, ante a súa aparición no territorio peninsular español. Estas medidas foron posteriormente modificadas á vista da evolución da enfermidade e seguindo o criterio do grupo de expertos previsto no Plan de intervención a que se refire a disposición adicional única do Real decreto 1228/2001, do 8 de novembro, mediante sucesivas ordes ministeriais, sendo a última a Orde APA/1202/2006, do 24 de abril, pola que se establecen medidas específicas de protección en relación coa lingua azul. Os axustes legislativos foron necesarios para xestionar o risco con base na situación epidemiolóxica no tempo e nas peculiaridades de cada sector específico.

Unha vez efectuada a análise dos datos históricos e recentes, tanto climatolóxicos como entomolóxicos, o grupo de expertos previsto no plan de intervención a que se refire a disposición adicional única do Real decreto 1228/2001, do 8 de novembro, considera que non existe risco de presenza de vector durante os meses invernales nunha determinada zona do territorio español (zona estacionalmente libre) e, por tanto, non existe risco de circulación viral na dita zona.

A este respecto, a decisión da Comisión 2005/393/CE, do 23 de maio de 2005, sobre as zonas de protección e vixilancia en relación coa febre catarral ovina e as condicións que se aplican aos traslados de animais desde estas zonas ou a través delas, prevé no seu artigo 3.3 o movemento de animais sensibles tras un período de tempo despois do cesamento da actividade do vector.

En función da situación actual da enfermidade, procede unha revisión da Orde APA/1202/2006, do 24 de abril, co obxecto de considerar durante un período de tempo determinado unha zona do territorio nacional como estacionalmente libre de lingua azul. Esta consideración deixará de ter efecto 28 días antes da data máis temperá

en que o vector poida reiniciar a súa actividade segundo os datos históricos ou inmediatamente se os datos climáticos ou os datos resultantes do programa de vixilancia e seguimento continuo indican un reinicio máis precoz da actividade dos mosquitos *Culicoides imicola* adultos.

Razóns de seguranza xurídica aconsellan, dado o alcance das modificacións, a aprobación dunha nova orde, que derroga a anterior, o que facilitará a súa aplicación.

Na súa virtude, e ao abeiro do establecido no artigo 8 da Lei 8/2003, do 24 de abril, de sanidade animal, e na disposición derradeira segunda do Real decreto 1228/2001, do 8 de novembro, polo que se establecen medidas específicas de loita e erradicación da febre catarral ovina ou lingua azul, dispoño:

Artigo 1. *Obxecto e ámbito de aplicación.*

O obxecto desta orde é establecer medidas específicas de protección contra a lingua azul, de aplicación a todo o territorio nacional.

Artigo 2. *Definicións.*

1. Para os efectos desta orde, serán de aplicación as definicións previstas nos artigos 3 da Lei 8/2003, do 24 de abril, de sanidade animal, e 2 do Real decreto 1228/2001, do 8 de novembro, polo que se establecen medidas específicas de loita e erradicación da febre catarral ovina ou lingua azul.

2. Así mesmo, entenderase como:

a) Centro de mostraxe para a lingua azul: aquela instalación baixo control da autoridade veterinaria competente, na cal se mantén un grupo illado de animais protexidos da acción de culicoides, ben por ser unha instalación creada para tal fin ou por ser unha explotación gandeira na cal se colocaron os dispositivos necesarios para impedir a entrada de culicoides, durante un período de tempo adecuado, co fin de someter os animais a probas de diagnóstico fronte á lingua azul.

b) Zona restrinxida estacionalmente libre, zona restrinxida non estacionalmente libre e zona libre: as previstas no anexo II.

Artigo 3. *Centros de mostraxe para a lingua azul.*

1. Nos centros de mostraxe para a lingua azul deberán cumprirse polo menos as seguintes condicións:

a) Proceder á limpeza, desinfección e desinsectación do centro entre cada partida de animais que se introduzan para a mostraxe fronte á lingua azul.

b) Utilizar insecticidas ou repelentes en todos os animais antes da entrada no centro e coa frecuencia de aplicación axustada á duración da súa efectividade, segundo as indicacións do produto e as recibidas do veterinario de explotación.

c) Pór en todas as naves da explotación mallas con diámetro de paso igual ou inferior a 5 mm en ventás, portas e outras posibles aberturas, impregnando estas mallas con insecticidas que teñan ademais efecto repelente. Repetir a impregnación antes de que perda algún dos dous efectos, seguindo as indicacións do veterinario, e polo menos repetir a aplicación cada 20 días, ou sempre que a chuvia fose de tal intensidade que puidese producir o arrastre dos principios activos. O titular debe coídar que o po non se acumule nelas, aplicando de novo os insecticidas con posterioridade a cada limpeza das mallas.

d) Tratamento con insecticidas autorizados de estroqueiras e zonas húmidas da explotación anexas a estas instalacións.

e) Levar un rexistro escrito das aplicacións realizadas cos repelentes e insecticidas, con indicación expresa das datas de aplicación.

f) Levar un rexistro detallado das entradas e saídas dos animais, coa súa identificación individual e as explotacións de orixe e destino.

g) Comunicarlles inmediatamente aos servizos veterinarios oficiais a sospeita de calquera sintomatoloxía que poidan ter os animais e que poida ser compatible coa lingua azul.

2. A aparición de animais positivos á técnica analítica de determinación de lingua azul dará lugar a que as autoridades de sanidade animal de orixe realicen un estudo, de xeito que permita descartar o risco de que o resto dos animais do centro de mostraxe poidan estar infectados, caso en que se poderá autorizar a saída de animais negativos do centro. Este feito porase en coñecemento das autoridades competentes de destino.

3. Os servizos veterinarios oficiais inspeccionarán con, polo menos, unha periodicidade mínima mensual, o cumprimento das condicións de autorización e, en especial, a efectividade dos medios empregados para manter os animais protexidos do ataque de culicoides.

4. Remitiráselle á Subdirección Xeral de Sanidade Animal do Ministerio de Agricultura, Pesca e Alimentación as autorizacións pertinentes e os códigos de rexistro dos centros de mostraxe para a lingua azul, co fin de elaborar unha listaxe das ditas instalacións.

5. En caso de que se trate de instalacións onde se agrupen animais de distintas orixes co fin de sometelos a probas de diagnóstico fronte á lingua azul, remitiráselle á Subdirección Xeral de Sanidade Animal do Ministerio de Agricultura, Pesca e Alimentación a información pertinente co fin de elaborar unha listaxe destas instalacións.

Artigo 4. *Vacunación de especies sensibles en zona restrinxida.*

1. A vacunación levarase a cabo baixo supervisión oficial e coas vacinas que para tal fin lles subministre a Dirección Xeral de Gandaría ás comunidades autónomas das zonas restrinxidas.

2. Os animais vacinados deberán marcar no momento da primovacinação cunha marca auricular de cor na cal figurará, polo menos, a lenda «LA». Non obstante, no caso de bovinos, esta marcación poderase realizar no documento de identificación bovina (DIB), previsto no Real decreto 1980/1998, do 18 de setembro, polo que se establece un sistema de identificación e rexistro dos animais da especie bovina, e deberase garantir en todo momento que esta marcación se mantén no DIB dos animais cando se emita un novo documento por parte das autoridades competentes das comunidades autónomas debido ao cambio de posuidor destes, ou outras circunstancias previstas no Real decreto 1980/1998, do 18 de setembro.

As autoridades competentes en sanidade animal das comunidades autónomas levarán a cabo un rexistro dos animais vacinados, nos cales, polo menos, figurará o ano/mes de primovacinação e de sucesivas vacinacións, o código de explotación e a identificación individual dos animais, cando proceda.

3. Co fin de darlle cumprimento ao establecido no artigo 11.2 do Real decreto 1228/2001, do 8 de novembro, as autoridades competentes das comunidades autónomas remitiranlle á Subdirección Xeral de Sanidade Animal os programas de vacinas que pretendan aplicar no seu territorio, co fin de trasladarillo á Comisión Europea.

Artigo 5. *Movemento de animais sensibles con destino a territorio doutros Estados membros.*

Os animais de especies sensibles de explotacións situadas na zona restrinxida poderanse mover directamente a territorio doutros Estados membros logo de autorización do Estado membro de destino, coas condicións que establece para o efecto a Decisión 2005/393/CE,

da Comisión, do 23 de maio de 2005, sobre as zonas de protección e vixilancia en relación coa febre catarral ovina e as condicións que se aplican aos traslados de animais desde estas zonas ou a través delas.

Artigo 6. Requisitos xerais dos movementos para a vida desde a zona restrinxida.

1. Todo movemento de animais de especies sensibles entre dúas comunidades autónomas, con orixe en explotacións situadas en zona restrinxida, deberá ser notificado pola autoridade competente en sanidade animal da comunidade autónoma de orixe á autoridade competente en sanidade animal da comunidade autónoma de destino cunha antelación mínima de 48 horas.

2. Todos os animais que abandonen a zona restrinxida para o seu movemento para a vida dentro de España deberán estar marcados. No caso de animais bovinos realizarase a marcación, polo menos, no documento de identificación bovina (DIB), previsto no Real decreto 1980/1998, do 18 de setembro, debéndose garantir en todo momento que esta marcación se mantén no DIB dos animais cando se emita un novo documento por parte das autoridades competentes das comunidades autónomas debido ao cambio de posuidor destes, ou outras circunstancias previstas no Real decreto 1980/1998, do 18 de setembro. No resto de ruminantes, a marcación efectuarase mediante unha marca auricular de cor.

3. Cando os animais abandonen a zona restrinxida, o transporte realizarase en vehículos precintados pola autoridade competente.

4. No certificado oficial de movemento previsto no artigo 50 da Lei 8/2003, do 24 de abril, ou como documentación adxunta, constará, ademais da identificación dos animais obxecto de movemento, a identificación do recinto do medio de transporte así como a identificación do responsable en orixe da aplicación destas medidas e, nos casos que así proceda, a documentación acreditativa do desinsectante ou repelente empregado (incluído o produto usado, data de aplicación e, de ser o caso, tempo de espera) e a documentación acreditativa do resultado das análises de laboratorio efectuadas a estes animais.

Artigo 7. Requisitos adicionais dos movementos para a vida desde a zona restrinxida estacionalmente libre con destino á zona libre.

1. Ademais dos requisitos previstos no artigo 6, todo movemento para vida dos animais das especies sensibles, procedentes de explotacións situadas na zona restrinxida estacionalmente libre con destino á zona libre, poderase realizar co cumprimento dalgún dos seguintes requisitos:

a) Que permanecesen durante polo menos 60 días na zona estacionalmente libre, despois da data de interrupción da actividade do vector, que é, respectivamente, o 1 de decembro de 2006 para as zonas incluídas na parte A.1 do anexo II, o 15 de decembro de 2006 para as zonas incluídas na parte A.2 e o 30 de decembro de 2006 para as zonas incluídas na parte A.3, ou

b) Que permanecesen durante polo menos 28 días na zona estacionalmente libre, despois da data respectiva de interrupción da actividade do vector, período tras o cal se tomaron mostras e resultaron seroloxicamente negativos (ELISA), ou

c) Que permanecesen durante polo menos 14 días na zona estacionalmente libre, despois da data respectiva de interrupción da actividade do vector, período tras o cal se tomaron mostras e resultaron viroloxicamente negativos (PCR), ou

d) Que se trate de animais nados despois da data respectiva de interrupción da actividade do vector, ou

e) Que se trate de animais vacinados: contra a lingua azul entre 30 días e un ano ou seis meses antes do movemento, dependendo da especie animal e tipo de vacina e protocolo de vacinación aplicado, ou

f) Que se trate de ovinos menores de 2 meses de idade nados de femias vacinadas con destino a ceba en explotacións situadas en zona libre, caso en que os animais quedarán inmobilizados na explotación de destino e terán como único destino final o sacrificio en matadoiros nacionais.

Para tal efecto, as autoridades competentes das comunidades autónomas, elaborarán unha listaxe de explotacións de ceba de ovino que cumpran os requisitos hixiénico-sanitarios para a súa autorización para recibir ovinos de ceba de menos de 2 meses de zonas de restrición. Esta listaxe seralle remitida á Subdirección Xeral de Sanidade Animal do Ministerio de Agricultura, Pesca e Alimentación co fin de elaborar unha listaxe nacional e póla á disposición das autoridades competentes das comunidades autónomas.

2. A autoridade competente unicamente poderá autorizar as excepcións previstas neste artigo durante o período de interrupción da actividade do vector.

No momento en que, a través do programa de vixilancia epidemiolóxica, se detecte que se reiniciou a actividade do vector na zona restrinxida afectada, a autoridade competente garantizará que se deixen de aplicar estas excepcións.

Artigo 8. Requisitos adicionais dos movementos para vida desde a zona restrinxida non estacionalmente libre.

1. Ademais dos requisitos previstos no artigo 6, todo movemento para vida dos animais das especies sensibles, procedentes de explotacións situadas na zona restrinxida non estacionalmente libre e con destino a explotacións situadas dentro da dita zona, poderase realizar co cumprimento dos seguintes requisitos xerais:

a) Os animais que se vaian transportar non presentarán signos clínicos de lingua azul o día do seu transporte.

b) Os animais serán transportados en vehículos de transporte que deberán ser desinsectados antes da carga, baixo supervisión da autoridade competente.

c) A carga e o transporte dos animais realizaranse, preferentemente, nas horas centrais do día ou da noite e, en todo caso, fóra das horas de máxima actividade do vector.

d) Todos os animais sensibles obxecto de movemento serán previamente tratados cun desinsectante ou repelente baixo supervisión da autoridade competente. Nas explotacións de orixe procederase á desinsectación previa dos locais e arredores en que permanezan os animais.

2. Ademais dos requisitos do punto anterior, os animais de especies sensibles de explotacións situadas na zona restrinxida non estacionalmente libre poderanse mover para a vida ao resto do territorio nacional co cumprimento dalgunha das condicións que se establecen no anexo I.

Artigo 9. Movementos para o sacrificio desde a zona restrinxida.

1. Todo movemento de animais de especies sensibles entre dúas comunidades autónomas, con orixe en explotacións situadas en zona restrinxida, deberá ser notificado pola autoridade competente en sanidade animal da comunidade autónoma de orixe á autoridade competente en sanidade animal da comunidade autónoma de destino cunha antelación mínima de 48 horas.

2. Os animais serán sacrificados baixo a supervisión oficial. A autoridade sanitaria competente do matadoiro será informada da intención de enviarlle animais e notificaralle a súa chegada á autoridade sanitaria competente en materia de expedición.

3. Cando os animais abandonen a zona restrinxida, o transporte realizarase en vehículos precintados pola autoridade competente.

4. No certificado oficial de movemento previsto no artigo 50 da Lei 8/2003, do 24 de abril, ou como documentación adxunta a este, constará, ademais da identificación dos animais obxecto de movemento, a identificación do recinto do medio de transporte así como a identificación do responsable en orixe da aplicación destas medidas e, nos casos que así proceda, a documentación acreditativa do desinsectante ou repelente empregado (incluído o produto usado, data de aplicación e, se for o caso, tempo de espera).

5. Polo demais, os animais de especies sensibles de explotacións situadas na zona restrinxida estacionalmente libre poderanse mover para sacrificio directamente ao resto do territorio nacional.

6. Os requisitos para autorizar os movementos para sacrificio de animais de especies sensibles desde explotacións radicadas na zona restrinxida non estacionalmente libres, con destino a matadoiro situado dentro da dita zona ou a matadoiro situado no resto do territorio nacional, ademais serán os seguintes:

a) Os animais que se vaian transportar non presentarán signos clínicos de lingua azul o día do seu transporte.

b) Os vehículos de transporte deberán ser desinsectados antes da carga, baixo supervisión da autoridade competente.

c) A carga e o transporte dos animais realizaranse preferentemente nas horas centrais do día ou da noite e, en todo caso, fóra das horas de máxima actividade do vector.

d) Os animais obxecto de movemento serán previamente tratados cun repelente o día do transporte, ou cun desinsectante cunha antelación máxima nese caso de 7 días naturais antes do transporte, tendo en conta o período de supresión do produto empregado baixo supervisión da autoridade competente.

Artigo 10. *Movementos de reses de lida destinados a espectáculos taurinos, desde a zona restrinxida.*

1. Todo movemento de reses de lida con destino a espectáculos taurinos terá a consideración de movemento a matadoiro, de acordo co establecido no artigo 9 desta orde.

2. Os animais aos cales non se lles dese morte durante a celebración do espectáculo serán sacrificados ou reexpedidos directamente á explotación de orixe no prazo que estableza a autoridade sanitaria onde se encontren os animais.

3. No caso en que os animais procedan de explotacións situadas en zona restrinxida non estacionalmente libre, os equinos e cabestros ou outros animais sensibles que puidesen entrar en contacto cos animais da partida deberán estar previamente desinsectados ou tratados con repelente, baixo supervisión veterinaria.

Artigo 11. *Esperma, óvulos e embrións.*

O traslado de esperma, óvulos e embrións de doadores de zona restrinxida rexerase polo previsto na Decisión 2005/393/CE, da Comisión, do 23 de maio de 2005.

Artigo 12. *Zona libre.*

Os movementos de saída desde unha zona libre, ou dentro da dita zona, de animais de especies sensibles, tanto para a vida como para o sacrificio, ou con destino a espectáculos taurinos, non están sometidos a ningunha condición específica con motivo da lingua azul.

Artigo 13. *Tránsito por zona restrinxida.*

1. Autorízase o tránsito de animais sensibles expedidos a partir dunha zona libre, a través de zona restrinxida estacionalmente libre, con destino directo a outra zona libre.

2. O tránsito de animais sensibles expedidos a partir dunha zona situada fóra das zonas restrinxidas non estacionalmente libres, a través destas zonas, rexerase polo previsto na Decisión 2005/393/CE, da Comisión, do 23 de maio de 2005.

3. Non obstante o previsto nos puntos anteriores, en todo caso o tránsito deberá recibir a autorización das autoridades competentes en sanidade animal das comunidades autónomas de tránsito e de destino.

Artigo 14. *Animais das especies equinas.*

Para os movementos de animais das especies equinas, con orixe en explotacións situadas na zona restrinxida non estacionalmente libre, deberán cumprirse as seguintes condicións:

a) Os animais obxecto de movemento terán sido desinsectados como máximo dentro dos 5 días naturais previos ao movemento. Así mesmo, os vehículos de transporte deberán ser desinsectados antes da carga.

b) A carga e o transporte dos animais realizarase fóra das horas de máxima actividade do vector.

Artigo 15. *Réxime sancionador.*

En caso de incumprimento do disposto nesta orde, será de aplicación o réxime de infraccións e sancións previsto na Lei 8/2003, do 24 de abril, sen prexuízo das posibles responsabilidades civís, penais ou doutra orde que poidan concorrer.

Disposición derogatoria única. *Derrogación normativa.*

Queda derogada a Orde APA/1202/2006, do 24 de abril, pola que se establecen medidas específicas de protección en relación coa lingua azul.

Disposición derradeira primeira. *Título competencial.*

Esta orde dítase de acordo co previsto no artigo 149.1.16.^a da Constitución, polo que se lle atribúe ao Estado a competencia exclusiva en materia de bases e coordinación xeral da sanidade.

Disposición derradeira segunda. *Entrada en vigor.*

Esta orde entrará en vigor o mesmo día da súa publicación no «Boletín Oficial del Estado».

Madrid, 22 de xaneiro de 2007.—A ministra de Agricultura, Pesca e Alimentación, Elena Espinosa Mangana.

ANEXO I

Requisitos mínimos dos movementos para a vida de animais de especies sensibles á lingua azul desde explotacións situadas en zona restrinxida non estacionalmente libre

O movemento de animais de especies sensibles á lingua azul desde explotacións situadas en zona restrinxida non estacionalmente libre a explotacións situadas no resto do territorio nacional poderase realizar se se cumpre algunha das seguintes condicións:

1) Que fosen protexidos dos ataques de culicoides durante, como mínimo, 28 días antes da data do traslado e fosen sometidos durante ese período a unha proba

serolóxica para a detección dos anticorpos do grupo do virus da febre catarral ovina, con resultados negativos, e esta proba deberase ter efectuado con mostras tomadas, como mínimo, 28 días despois da data de inicio do período de protección contra os ataques de vectores.

2) Que fosen protexidos dos ataques de culicoides durante, como mínimo, 14 días antes da data do traslado e fosen sometidos durante ese período a unha proba de illamento do virus da febre catarral ovina ou unha proba de reacción en cadea da polimerasa (RT-PCR), con resultados negativos, e esta proba deberase ter efectuado con mostras de sangue tomadas, como mínimo, catorce días despois da data de inicio do período de protección contra os ataques de vectores.

3) No caso de animais vacinados:

a) Que se trate de ovinos vacinados con vacina viva atenuada contra a lingua azul entre 30 días e un ano antes do movemento.

b) Se se trata de animais vacinados con vacina inactivada durante o período de circulación viral, os animais obxecto de movemento deberán cumprir os requisitos que a seguir se describen para poder realizar o traslado:

1.º Animais da especie bovina con destino para a vida: deberán transcorrer 60 días desde a aplicación da segunda dose vacinal ou ben realizar unha toma de mostra a partir dos 25 días da aplicación da segunda dose vacinal, para a realización dun PCR con resultados negativos sen que sexa necesario o illamento. Unha vez efectuada unha destas condicións, o prazo máximo para o movemento será de 6 meses desde a aplicación da segunda dose vacinal.

2.º Animais da especie ovina con destino para a vida: para autorizar o movemento deberán transcorrer 30 días desde a aplicación da segunda dose vacinal en caso de vacinas para aplicar en dúas doses, ou 30 días despois da aplicación da dose única no caso de vacinación para aplicar cunha soa dose. O prazo máximo para o movemento será de 1 ano ou de 6 meses respectivamente.

4) Que se trate de ovinos non vacinados de ata 2 meses de idade nados de femias vacinadas, con destino a ceba, caso en que os animais só se poderán destinar a cebadeiros autorizados polas autoridades competentes de destino.

ANEXO II

Clasificación de zonas en función dos datos de actividade de Culicoides imicola adultos

A. Zona restrinxida:

A.1 Zona estacionalmente libre.

Provincia de Ciudad Real.

Provincia de Toledo: as comarcas de Almorox, Gálvez, Madrudejos, Mora, Los Navalmorales, Ocaña, Oropesa, Quintanar de la Orden, Talavera de la Reina, Toledo, Torrijos e Yuncos.

Provincia de Albacete: a comarca veterinaria de Alcaraz.

Provincia de Ávila: as comarcas veterinarias de Las Navas del Marqués, Navalunga e El Barco de Ávila.

Provincia de Salamanca: as comarcas veterinarias de Béjar, Ciudad Rodrigo e Sequeros.

Provincia de Cáceres: as comarcas veterinarias de Coria, Valencia de Alcántara e Zorita.

Provincia de Badajoz: a comarca veterinaria de Herrera del Duque.

A.2 Zona estacionalmente libre.

Provincia de Toledo: a comarca de Belvís de la Jara.

Provincia de Ávila: as comarcas veterinarias de Sotillo de La Adrada, Candeleda, Arenas de San Pedro e Cebreros.

Provincia de Cáceres: as comarcas veterinarias de Plasencia, Trujillo, Cáceres e Navalmoral de la Mata.

Provincia de Badajoz: as comarcas veterinarias de Zafra, Azuaga, Castuera, Jerez de los Caballeros, Badajoz e Mérida.

Comunidade de Madrid: as comarcas veterinarias de Aranjuez, El Escorial, Griñón, Navalcarnero, San Martín de Valdeiglesias, Arganda del Rey, Villarejos de Salvanés, Alcalá de Henares, Torrelaguna, Colmenar Viejo e municipio de Madrid.

Provincia de Jaén: a comarca veterinaria de Andújar, Jaén, Alcalá la Real, Huelma, Úbeda, Linares e Santiesteban del Puerto.

Provincia de Córdoba: as comarcas veterinarias Montoro, Pozoblanco, Hinojosa del Duque, Peñarroya-Pueblo Nuevo, Posadas, Montilla, Lucena e Baena.

Provincia de Sevilla: as comarcas veterinarias de Lebrija, Marchena, Osuna, San Lúcar la Mayor, Utrera, El Ronquillo, Cazalla, Cantillana, Carmona e Écija.

Provincia de Cádiz: as comarcas veterinarias de Litoral, Campiña, La Janda e Sierra de Cádiz.

Provincia de Málaga: as comarcas veterinarias de Ronda, Estepona e Antequera.

Provincia de Huelva: a comarca veterinaria de Cartaya.

A.3 Zona estacionalmente libre.

Provincia de Huelva: as comarcas veterinarias de Cortegana, Aracena, Puebla de Guzmán, Valverde del Camino, La Palma del Condado e Almonte.

Provincia de Badajoz: Don Benito.

A.4 Zona non estacionalmente libre.

Provincia de Málaga: as comarcas veterinarias de Málaga, Cartama e Vélez Málaga.

Provincia de Cádiz: a comarca veterinaria de Campo de Gibraltar.

Cidades de Ceuta e Melilla.

B. Zona libre: o resto do territorio nacional.

MINISTERIO DE INDUSTRIA, TURISMO E COMERCIO

1613 *ORDE ITC/71/2007, do 22 de xaneiro, pola que se modifica o anexo da Orde do 28 de xullo de 1980, pola que se aproban as normas e instrucións técnicas complementarias para a homologación de paneis solares.* («BOE» 23, do 26-1-2007.)

A certificación dos captadores solares planos de baixa temperatura iniciouse no noso país en 1980, como resposta tecnolóxica ante a primeira crise do petróleo. O Instituto Nacional de Técnica Aeroespacial (INTA) desenvolveu normas propias para ensaio dos captadores.

As normas e instrucións técnicas complementarias para a homologación de paneis solares aínda en vigor son as que se conteñen no anexo da Orde do 28 de xullo de 1980, pola que se aproban as normas e instrucións técnicas complementarias para a homologación de paneis solares. Neste anexo recolleuse a terminoloxía e o método de ensaio dos captadores solares para efectos da súa certificación.

O Plan de Enerxías Renovables (P.E.R.) en España (2005-2010), aprobado o 26 de agosto de 2005, supón un